


Art, design e tecnologjie che a nassin dal ricicli

Intal "BluLab" a Udin incuintris, laboratoris e mostris, par grancj e piçui, sul teme de sostenibilitât

Dut al partis de idee che "sostenibil al è biel", che la bielece dal inzegn, dal fâ e dal pensâ riciclant e prodûs design, tecnologjie e art. Cussì, cun cheste filosofie, al è nassût "BluLab", un spazi dulà che, scomençant di materie e materiâi, si vierzin confronts e relaziuns tra monts diferents: de ecologie ae produzion industriâl, de art al design, des sciencis aes tecnologjiis, de formazion ae comunicazion. Un lûc viert ai fruts, e no dome, in vie Pradaman 21 a Udin, dulà zuiâ cui materiâi insiem a gjenitôrs e compagns di scuele e scuvierzi intune mostre il cicli di vite di lens, veris, metai, plasticis, cemût che a mudin, cul jutori de tecnologjie, intun prodot finît e in ce maniere doprà i scarts des lavoraziuns cence butâju vie, si ben trasformantju in robis gnovis, tant che un libri o un tapêt. La idee e je chê di imparâ a viodi ogni robe produsude no tant che un refudon futûr, ma tant che un materiâl che si pues tornâ a doprà intun cicli che no 'nt cambie lis cualitâts, tant che al sucêt tal ricicli tradizionâl.

Il "BluLab", screât sabide ai 27 di Fevrâr, al cjape il non dal colôr dal cil e dal mâr, il colôr de sostenibilitât. Lu puarte indenant la associazion culturâl Modidi in convenzion cul Comun e la Universitât di Udin (par vê informaziuns si pues clamâ il numar 0432/900656 o scrivi ae direzion mail: modidi@modidi.it o lâ a dâ un cuc al sit: www.modidi.it), in continuitât cui progjets di educazion ae art e ae creativitât e al svilup sostenibil puartâts indevant tai agns di Modidi e dal Centri ReMida di Vile Manin di Passarian.

Incuintris, laboratoris, mostris a ciraran di sensibilizâ al teme de sostenibilitât, che al è un mût di vivi, di produsi e di consumâ, che, a traviert dal ûs des materiis primis e des risorsis energetichis, tal plen



Fruts che a scuvierzin lis caracteristicis dai materiâi dilunc dai laboratoris di ricicli creatif dal Centri ReMida a Passarian

rispiet de persone, al vûl sodisfâ i bisugns di vuê sigurant la disponibilitât des risorsis aes gjeneraziuns che a vignaran.

In cheste suaze, si zonte ancje il progjet de prime bancje dâts taliane di eco-design dedicate ai materiâi riciclati e al lôr ûs tal mont de produzion e dal design: un imprest, ma prin di dut un servizi che si indrece a aziendis, libars professioniscj, designer, universitâts, centris di ricercje pal svilup di prodots e servizis sostenibii.

